

拜中宮殿並依辛卯年例也○已亥夜坤方南方有氣如火光○二月朔庚子副提學尹惠教等上劄以時疹大行癘氣兼熾請寢寧陵行幸不許○嬪宮疹候平復藥房提調趙顯命及醫官李燁金應三等各賞賚有差○辛丑以李世瑾為大司諫柳儼為校理權赫為副校理趙迪命為修撰金始烱為承旨○諫院申前啓不允○領議政洪致中右議政李堦藥房提調尹淳副提調趙顯命等求對入侍請寢陵幸至以庭籲為言上曰欲為則為之予實愧古帝王之至誠感人致有此舉然則予豈無過舉乎顯命曰殿下失言矣古人有拔刀斷鞅者當時人君尚無過舉今殿下何為而發此教也上曰卿等必欲寢予行而予亦有固執况君臣分義至重昨承下教之後今又賓廳會議可乎今予夢往寧陵此由於至誠所發而卿等欲為防塞耶○壬寅領議政洪致中等率二品以上陳啓請寢陵幸上引見時又有大小公事留院之命諸臣交口迭請上終不許仍下教曰卿等之言或以癘疫或以賊變此皆恐動之說卿等勿復言○禮曹判書沈宅賢知事金始煥俱上疏請寢陵幸令並還給其章○領府事李光佐又上疏請寢陵幸曰聖上必欲於戊申秋展省而只緣察納羣臣之至懇感動黃髮之忠言黽勉差退以